

PRIMA RI SIRA

Nègghia.

A matina ,
cuannu si stenni supra 'a ciana,
'mpiccicusu
'u scuru ancora penni
e supra ô cori pisa râ nuttata
e, assai cunfusu,
sulu ti senti nâ jurnata
e a primu vespri gghià ti cala 'a sira.

Ma eccu , a la 'mpruvisa,
nô cielu 'n'uocciu si rapi
e 'u sulì ti talia
e l'ùm'ra to t'arrenni ppi cumpagnia.

E ora cu po' nijàri ca è l'arba râ matina,
ri 'n'âtra jurnata ca spunta prima 'i sira ?
E c'è cu cumprèta 'u so travagghiu,
cu cuntinua 'u so viagghiu
e ,macari,
cu stenni i rrobbi p'asciucari.

Allura,
cuannu t'arriva 'u vèspri râ ta vita,
prima ca 'a sira scura,
cuannu t'ammuschia 'u sciatu
e, caminannu,
abbucateddu 'n puocu ti ni vai,
pirchè no ! 'n po' bbèniri 'n pinzièri
ca ti rapi 'a menti,
e 'u schinu t'addrizza e 'u 'ngiègnu,
o ri sancu nòva 'na sbrizza nô cori parpitìa
e 'i sintimienti 'n sciusciu t'alliscia
e t'allarica la malincunia ?

E 'a sira ca arriva arrimanni ppô 'nnumani sira !